



國家清史編纂委員會·文獻叢刊

六編

清代稿鈔本

第二九五冊

國家清史編纂委員會・文獻叢刊

六編

清代稿鈔本

第二九五冊

廣東省立中山圖書館
中山大學圖書館

編

主編 桑兵
副主編 李昭醇 程煥文 劉洪輝

SPM

南方出版傳媒
廣東人民出版社

・廣州・

第二九五冊目錄

京報摘鈔

京報摘鈔

不分卷

光緒二十年三月至光緒二十三年六月

佚名輯

鈔本

光緒二十年三月初一日京報

御史楊辰

再民為邦本政在養民治亂之由昭垂史鑑州縣為親民之吏果使清廉勤慎則政成民和天下自然無事然循謹者固不乏人而貪妄者亦復不少有如錢糧本係國家正供斂之以時民亦輸將自効若非時預徵恐民力實多不逮挖肉補瘡必傷政體是故定有例限禁止暴徵乃近來州縣每藉口於部議之嚴竟於開印即行開徵且令營勇帶差催促追呼既迫擾累更深在下者飲泣吞聲困於借貸為上者挪移妄用輒至侵虧誠恐國帑民生兩受其敝又如尋常詞訟到案訊問例禁嚴刑蓋非強盜熬刑贓證既真堅不吐供者比乃各州縣每遇訊審不論何犯酷用刑威且有私設非刑以示嚴厲者嚴刑之下何求不得儻有誣屈必至上干天和應請明降諭

旨申明定例仍按上下忙徵收錢漕不准託詞豫徵其尋常事犯不得濫用嚴刑及私造刑具僅有違例逞私從嚴叅劾庶幾民生得以休養吏治亦可澄清矣是否有當伏祈 聖鑒謹 奏光緒二十年二月二十七日奉 上諭御史楊晨奏近來各省州縣有非時豫徵錢糧及濫用酷刑等弊請申明定例通行飭禁等語各省徵收上下忙錢糧例有定期所以體恤小民俾得以時完納審理詞訟案件亦應悉心研鞠以期無枉無縱豈得專事刑求若如該御史所奏近來州縣非時豫徵且令營勇帶差催促擾累更深審訊尋常案件動用酷刑似此殘暴情形殊堪痛恨著各省督撫督同藩臬兩司嚴加查訪如有前項情事立即嚴叅懲辦不准稍涉徇隱欽此

光緒二十三年三月留日京報

大學士直隸總督一等伯臣李鴻章跪 奏為串謀嚇詐捏詞誣控
審明定擬恭摺仰祈 聖鑒事竊查昌黎縣民人顧洛天糾邀王鴻
遠訛詐李天爵未成砌詞京控經步軍統領衙門發交通永道審辦
旋奉光緒十九年五月二十四日 上諭有人奏書吏交結訟棍請
飭拿辦一摺據稱直隸通永道衙門書吏諸錫庚交結訟棍張乃庚
趙和順等同謀造意囑令因案脫逃之永平府民人王鴻遠捏控商
民李天爵諸錫庚賄託委員楊春元將李天爵監禁數月並不審訊
張乃庚趙和順現在宣武門外鐵門峻太永煤棧藏匿等語所奏如
果屬實亟應拿究懲辦著李鴻章孫家鼐孫楫按照原奏各節確切
查明據實具奏等因欽此當經府尹臣飭委治中訊明書吏人等並

無賄虐情弊先行奏結其李天爵王鴻逵互控一節經臣飭發集司周馥審辦茲據司督同保定府審明擬議解勘值臣駐津委審無異臣覆加確核緣顧洛天王鴻逵分隸昌黎臨榆等縣與李天爵素不識面顧洛天為人兇橫人皆側目王鴻逵祖父王詔元於道光年間在山海關開設廣春源錢鋪歇業已久李天爵祖父李元濤亦與族人在昌黎縣夥開元巨銀爐彼此並無銀錢糾葛光緒十八年閏六月間王鴻逵顧洛天昌黎縣辛集街開設糧鋪邀顧洛天在鋪執事並邀已獲之顧洛潤未獲之顧洛占等作夥尚未開張顧洛天先放銀兩王鴻逵見其放處不妥辦事欠穩再開顧洛天堅欲開設因無本錢稔知李天爵家道殷實人又長厚從前其祖曾開銀爐與王鴻逵之祖錢鋪必有銀錢出入事已年久李天爵必然知不清楚起意

設局訛詐捏以李天爵之祖欠王鴻逵祖父錢鋪東錢五十二萬五千五百串商令王鴻逵出名伊往討索王鴻逵貪利允從顧洛天恐李天爵不認先託其邨人李昌文暗地致意聲言此帳如果不還王鴻逵性情不好事難完結李昌文因畏顧洛天兇橫當為轉致並稱究竟有無此帳仍令李天爵確查李天爵當查元巨號舊帳與廣春源並無往來知係訛詐七月初一日顧洛天隨帶顧洛潤等往討李天爵稱無憑據不能給錢顧洛天令其妻姪韓洛潤捏造假帳借帖又因李天爵係屬商人必畏官勢令王鴻逵假稱職官向其嚇詐是月初五日顧洛天借得轎車一輛令王鴻逵乘坐並令其工人楊福裝作頂馬自與顧洛潤乘坐大車偕至李天爵糧鋪顧洛天將李天爵喚出聲言王鴻逵係屬職官令李天爵車前回話李天爵仍索借

據王鴻逵因帳帖不真不敢交出顧洛天恐露形迹即言此處不便
看改日進城邀請數人再看搪塞回歸顧洛潤等僅止隨同往討不
知訛詐嗣李天爵因王鴻逵等氣勢甚餒顯係局詐控縣差傳王鴻
逵聞風逃逸將顧洛天顧洛潤傳案訊出實情交差看管旋因患病
取保顧洛天捏以李天爵昧良抗債訟棍趙玉堂門丁趙二惡役王
振東勾串捕廳擅受刑逼等情寫就呈詞誑令王鴻逵之母徐氏遣
抱赴京控經步軍統領衙門發通永道提訊王鴻逵聽從顧洛天唆
使亦以前情赴道並赴府尹衙門妄控旋有人以道署書吏交結訟
棍賄託委員酷虐商民等情奏奉 諭旨交臣等查明覆奏當經府
尹臣飭委治中訊明書吏人等並無賄虐情弊先行奏結其李天爵
王鴻逵互控欠案由臣發交臬司審辦據供前情不諱查例載兇惡

棍徒屢次生事行兇無故擾害良人人所共知確有實據者發極邊足四千里安置等語此案顧洛天因李天爵家道殷實糾王鴻逵捏造帳據假稱職官向李天爵訛詐未成復砌捏李天爵聽從慣訟趙玉堂抗債不還丁差捕廳勾串刑逼等情索令王鴻逵並誑其母王徐氏先後赴道赴京妄控查該犯王鴻逵假稱職官有所求為僅止空口捏稱並未假冒頂戴與實在詐假官者有間即從重照充假官問擬亦不過發近邊充軍惟其局詐不遂砌詞妄告使李天爵訟累經年身遭官押案內牽連人證亦不多實屬生事擾害雖無行兇情事惟其陰謀詭計中傷無形較之無故逞忿行兇者情尤可惡自行從重按照兇惡棍徒屢次生事行兇無故擾害良人例擬發極邊足四千里充軍至配杖一百折責安置左面刺烟瘡改發四字王鴻逵

從顧洛天捏造帳據假稱職官訛詐李天爵未成砌詞誣控應於顧洛天所得重罪上減一等擬杖一百徒三年至配折責拘役遵照新章辦理顧洛潤兩次隨同索帳其於顧洛天等設局訛詐並不知情惟不審虛實輒行隨往究有不合應酌照不應重律擬杖八十折責發落王徐氏京控失實係受顧洛天誑騙已罪坐顧洛天等該氏係屬婦女從寬免議縣役王振東訊無勾串賄囑情事亦毋庸議韓洛潤等緝獲另結除備錄供招咨部並咨步軍統領衙門銷案外所有審明定擬緣由理合會同兼管順天府府尹孫家鼐署順天府府尹臣顧瑄恭摺具陳伏乞 皇上聖鑒勅部核覆施行謹 奏奉 硃批刑部議奏欽此

光緒二十二年三月初日京報

頭品頂戴湖南巡撫臣吳大澂跪 奏為揀員對調知縣以資治理
恭摺仰祈 聖鑒事竊照知縣為親民之官撫字催科責任綦重必
須人地相宜方克勝任臣與兩司所屬州縣中隨時留心考察查有
祁陽縣知縣沈寶幹年三十八歲廣東南海縣人由附生中式同治
癸酉科舉人光緒九年癸未科會試中式進士 殿試二甲第一百
零三名引 見奉 旨以知縣即用欽此簽掣河南親老告近改掣
湖南於光緒十年十一月二十三日到省 題補祁陽縣知縣先赴
署理十二年十月二十一日到任旋奉部覆准十三年十一月二十
六日奉文實任又平江縣知縣梁榮熙年三十九歲廣東順德縣人
由附生中式同治癸酉科舉人光緒九年癸未科會試中式進士

殿試三甲第十九名引見奉旨以知縣即用欽此籤分湖南於光緒十年閏五月初四日到省題補平江縣知縣奉部覆准十四年二月初一日到任該員沈寶幹性情謹飭辦事安詳惟該縣現值整頓錢糧釐剔弊端事多更始人地不甚相宜該員梁榮熙穩練勤明才堪肆應若以之互相對調辦理可期勝任據布政使何樞按察使王廉會詳前來相應請旨將祁陽縣知縣沈寶幹調補平江縣知縣即以平江縣知縣梁榮熙調補祁陽縣知縣如此一轉移間人地各得其宜於地方實有裨益該員等均係現任知縣互相對調缺分相同任內並無承追督催展叅處分毋庸送部引見理合會同湖廣總督臣張之洞恭摺具奏伏乞皇上聖鑒敕部核覆施行謹奏奉硃批吏部議奏欽此

原補湖南永州府祁陽縣係冲煩中缺沈寶幹人地不宜奏請對調岳州府平江縣係疲難中缺梁榮熙

光緒三十年三月初九日京報

御史安維峻片 再前大學士陝甘督臣左宗棠奏請入籍十年者准其應試原係以廣招徠藉實邊疆土地為一時權宜之計乃自奏准以來入籍者仍屬寥寥土地之荒涼如故而官場則以為大開方便之門或自家子弟或幕友親戚公然冒入學籍顧使地方實有其人令土著之人藉資觀感猶可言也乃應考時紛然偕來入學後飄然遠颺所謂博士弟子者徒空名耳又使本人應考土著之人不能爭勝或可生其愧奮之心乃籍已冒矣而入場者多屬槍替則不惟冒籍而又冒名鄉試之日百端舞弊官場互相徇隱士子不敢稟揭甚且至公堂執事人員送點心什物直呼某號某生而予之視朝廷功令毫無忌憚如是而弊竇安得不深本籍士子之心安能帖服

及來京覆試本籍舉人向出結京官聯名指揭為京官者屈於督臣
勢力不敢攻發即具呈都察院轉咨禮部行查本省督臣取具地方
官印結則捏為入籍已過十年蓋冒籍者非其同鄉子弟即其幕友
親戚誰肯自首者至冒籍者之三代自入學時早已捏造與其服官
父兄之名迥然不同是為倖進之故先不有其父母即其父母病故
並不呈報丁憂不孝之人他日安能作忠而為大言以欺人者則謂
天下一家何此疆爾界之分既與 朝廷清查籍貫嚴防跨考之意
大相悖戾且謂本籍之人太吏有意招徠試問冒籍諸人果家於何
地稍有天良者度不敢飾詞以應也伏查甘肅額不敷取進者惟蘭
州府屬之渭源甯夏府屬之甯夏朔慶陽府屬之合水環縣秦州
屬之兩當固原州屬之平遠擬請將此數處學額或扣留或裁減任